

# Spligia-Tambo lantscha tariffa d'indigens per tuts

Reducziun dals debits ed agid dal maun public duajan salvar l'indriz da las pendicularas

DA BARTOLOME TSCHARNER / ANR

■ Il cussegl d'administraziun da las Pendicularas Spligia-Tambò (PST), sut il presidi da Franco Quinter, è be tschintg emnas en uffizi e gia ha el preschentà mardi saira la strategia e preschentaziun nova ed il proceder per sanar finanziain il manaschi. Cun considerablas reducciuns da pretsch vulan els attrair famiglias e gruppas. Ina tschientina d'interessadas ed interessads ha fatg part da l'emprima sairada d'infurmaziun. Franco Quinter aveva annunzià ina politica d'infurmaziun transparenta dal cussegl d'administraziun nov cura ch'el ha surprindì l'uffizi ils 28 d'avrigl. E quell'empermischun ha el mess en vigur. Be tschintg emnas suenter l'elecziun ha el preschentà las ideas novas che duajan salvar l'interpresa che ha debits da 6,5 milliuns ed a partir dal fanadur tant sco nagina liquiditad pli. «Tuttina», di Quinter, «datti acziunaris, investurs curaschus e cussegliers administrativs che vulan s'engaschar en favur da las PST ed en favur da la region ch'i possa vegnir fatg in'entschatta nova. Pertge da laschar murir las pendicularas avess consequenzas desastrusas per l'entira region.» Quai è ina constataziun evidenta, essend las PST il sulet manaschi da transport a muntogna da la vallada dal Rain posteriur, dal qual dependa in'entira chadaina d'auters affars e tantas plazzas da lavur. Il cussegl d'administraziun nov ha alura er giuditgà sco betg duvrabla l'uschenumnada «strategia 2025» ch'era vegnida elavurada l'onn passà per sanar las PST, perquai che las contribuziuns da las vischnancas avessan stuì vegnir impundidas per pajar ils tschains bancars empè d'als pudair trair a niz per il manaschi.

## Bancas prontas da reducir ils debits

En las tschintg emnas ch'el è en uffizi ha il cussegl d'administraziun nov manà discurs cun las duas bancas involvidas, cun la regenza grischuna e cun l'Uffizi d'economia e turissem sco er cun investurs privats ed ils represchentants da las 12 vi-



Ernel Sertkan, il manader da fatschenta nov da las Pendicularas Spligia-Tambò, ha adossà in grev pensum da sanar il manaschi en ferma imballantscha.

FOTO B. TSCHARNER

schnancas da Valrain e Schons che tegnan la maioritad da las aczias. Damai ch'il manader da fatschenta *Andrea Camastral* ha demissionà èsi vegnì engaschà er in mainafatschenta nov. Las PST han actualmain 6,5 milliuns debits. «Cun quels daivets pudessan las PST vegnir a frida, sche nus disponessan da meds liquids», di *Renato Mengelt*, il parsura communal da Spligia. Ma il manaschi è deficitar, ed ils ultims onns è la svieuta sa reducida cuntinuadamain per radund 0,5 en fin in milliun ad onn.

## Appel a las vischnancas da la region

Cun quella situaziun da partenza avess il manaschi gnanc pudì vegnir garantì per la proxima stagiun. Tenor las analisas ch'èn vegnidas fatgas basegna quai oramai mesiras d'urgenza sco ina remissiu-

dal debits, la reducciun dals custs cun optimar il manaschi operativ, augmentar la svieuta, ina meglra reclama e surtut cun augmentar l'agid finanziain dal maun public, pertge il basegn finanziain per ils proxims onns importa tranter tschintg e sis milliuns per sanar e mantegnair ils indrizz tecnics. L'agid finanziain haja da capitar proximamain per insumma pudair pajar las pajas dals impiegads. «Cun las bancas avain nus pudì manar tractativas positivas», di Quinter. «Ellas èn prontas da reducir il debit per 80–90%.» Ma quai vegn betg a tanscher perquai ch'in defect vi da l'indriz da regulaziun dals motors da las gondlas, capità ultimamain, ha da vegnir reparà avant la proxima stagiun. Perquai lantscha Quinter in appel urgent als represchentants dals vischinadis da la region da vulair sustegnair lur dumon-

das da sustegn en l'autezza dad 800 000 francs en las radunanzas communalas che han da succeder anc avant las vacanzas da stad per impedir la procedura da relasch u da concurs, la quala saja tuttavia betg esclusa, tenor Quinter. Ma da giuditgar tenor las reacziuns or dal public èsi da quintar ch'ils 12 vischinadis da Valrain e Val Schons vegnian a conceder lur cumpart d'agid finanziain a las PST.

## Strategia nova e preschentaziun nova

La crisa da las PST n'è betg be ina dumonda finanziaina. Ellas basegnan er ina preschentaziun nova sin il martgà turistic. Per cuntanscher quella finamira procura il cusseglier administrativ *Ivo Frei* cun sia agentura che ha sviluppat ina strategia mercantila tut nova. La finamira da quella èsi da crudar en egl per sa distin-

guer dad auters lieus turistics per la finla augmentar las frequenzas. Per cuntanscher quai focusseschan els lur purschida en l'avegnir consequentamain sin famiglias e gruppas. Da cuminanza cun Viamala Turissem vulan els er acquistar giasts or dal Tessin. Perquai vegnan tut las indicaziuns a vegnir fatgas bilinguas. «Quella strategia vegn natiralmain pir a vegnir messa en vigur cura che la finanziaziun è segirada», di Frei che fa er a sa-vaire ch'il cussegl d'administraziun haja prestà voluntariamain tutta lavur d'enfin uss.

Per metter ad ir la strategia nova è vegnì engaschà *Ernel Sertkan* sco nov manader da fatschenta. Sertkan è directur da marketing ed ha fatg experientschas professiunalas a Churwalden ed a San Murezzan.

## La carta da mal'aura ed uffants van gratuitamain

Cun agid d'ina rotscha da purschidas empermettentas duai vegnir promovida la stagiun d'enviern 2017/18. Uschia vegn introduci ina carta da mal'aura. Quai munta ch'ins possa acquistar ordavant la carta dal di per mez pretsch sch'igl è preditg mal'aura per la fin d'emna. La tariffa per indigens vala en general per tut ils giasts. L'abunnamment stagiunai importa danov 280 francs per giuvenils e 390 per creschids, quai che munta che tuts pon profitar d'ina reducciun da pretsch d'enfin 40%. Unfants d'enfin 12 onns pon viagir per nagut. I vegner a dar ina fin d'emna d'emprova gratuita per tuts che ha lieu ils 9 e 10 da december.

L'engaschament, il curaschi e l'entusiassem dal cussegl d'administraziun nov è admirabel, ed igl è da sperar ch'i reusseschia ad el da mantegnair las PST per il bun da la region.